



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

**TAPAK 8**

Priyanka Chopra nem Dadasaheb Phalke Academy Award agütsütsü

VOL. XIV NO. 221 (ADOK 221)

DIMAPUR

TUESDAY

MAY 30, 2017

5.00

**TAPAK 9**

Chiyungtsü achitsü atema Centre-i lemtettsü makok: Mamata



## Dimapur nung bomb apok; 1 asü DOKANTEM GHONDA 12 SHIBANGTSÜ

**Dimapur, May 29 (TYO):** police ketdangser kati metedaktsü. Dimapur nung Nyamo Lotha Road nung Hombar aonung 7:00 ako meta mozü ayokdak 'Ideal Pharmacy' nung bomb pokloktsüdang, nisung ka asü aser 4 yiru.

Tenük kuli agütsürtemi ashiba agi, nisung ana gari ka nung arur dukan nung bomb mereploktsür jena ao.

Yirua alirtemji salesman asem aser customer ka lir aser tasüsangji Abdul Rashid ta jangjaogo. Pa kanga mejungi yirur mozü kidang anepalu saka taküm mekümkütet.

Tanüngba nisungtemji Bindan Biwas (39), Dilwar Hussian (22), Mithu Biswas (42) aser customer Ihelung Newmai (22) nungertem lir. Par pezüprongla Nikos hospital nung anepaludar.

Mozü ayokba dukan nung pokdaktsübaj 'crude bomb' ka liasü aser onoki iba tatalokba atema bushisüngdang ka tenzükogo, ta

## Kohima nung NE NSS Youth Festival temogo

**Kohima, May 29 (TYO):** Indira Gandhi Stadium Kohima nung ayongzüka amungba anogo pezünü North East National Service Scheme (NSS) Youth Festival Hombarnü tembangogo.

Iba benjung ya 'learning together' omen nung ajemdaker Department of Youth Resources & Sports, NSS cell Nagaland-i Union Ministry of Youth Affairs & Sports den yaritepa ayongzük.

Benjung tembangba sentong nung Youth Resources & Sports Secretary, Anenla S. Longchari-i o jembang, North East state 8 tsüngda telongjem alitsü indang tayongzükba agütsü.

Youth Festival nung state tem nungi nisungtemi shilem tapu balala agir aser iba sabang nung state temi kati ka indang sobaliba, tetsü-tebou ken aser yartsüngsangtem angazüker, ta S.

## Tanü Nagaland nung tzünglu arua mopung aontsü

**Dimapur, May 29 (TYO):** asüng northeast tsütsü aontsü. Iba lagi May 30 nü Nagaland nung tzünglu tulu aruba den mopung tesashi aontsü, ta Nagaland sorkar sangdong ka nung metedaktsü.

Iba dak sendakba nung pei District Disaster Management Authority aser Nagaland State Disaster Management Authority (#9555844253) den metetpelatsü metedaktsür, ta kasa sangdong nungshia lir.

**SENYONG  
NÜ SENTI VOTE  
TEYOKMA.  
TANÜ ASEK LIMA NUNG TEMENEN AJAK  
DERAJI SENYONG VOTE AYOKBA YA LIR.**

## Nagaland nung alirtemi meteta telemtetba agitsüla: NTC



New Delhi nung Nagaland Tribes Council(NTC) lennirtemi Inida Prime Minister, Narendra Modi den pa indang office nung ajurutepdang agiba noksa ka angur.

**Dimapur, May 29 (TYO):** 'Framework agreement' ji August 3, 2015 nü India Prime Minister aser Home Minister na lia, NSCN(IM) aser Interlocutor R.N. Ravi tsüngda 'Framework' sign sütepbaji India Linük Temzung kubok agiba asütsü. Ajisüaka, tang tashi sign asürtem dak alaka, shingaia iba tenangzüktep nung enoka aliba onüktem memetet, ta Media Cell, Nagaland Tribes Council(NTC)-i sangdong ka nung metedaktsü.

'Framework agreement' ji shinga nema memetetdaktsü lir aser talisa Nagaland nung aliba Naga nunger dang miimshir.

Iba tenangzüktep agiba sülen ita 18 buba arudang, India sorkari Manipur nunger dang Framework nung Manipur state kongshia mali ta shiogo. Ibajiajanga Framework ji Nagaland atema dang lir ta sayur saka Nagaland nung aliba Naga nunger dangbo iba dak sendakba kecha memetetdaktsü dang arur ta NTC-isa ashi.

Naga yimten tebilemtsü atema olemtip tenzükba sülen nungi Nagaland nung alirtem iba mapa nung medendaktsü dang arur. Iba lagi NTC-i Nagaland state dak sendakba tebilemtsütem atema telemtetba agiba nung Nagaland nung aliba Naga nungertem adentsüla ta India sorkar nem NTC-i takhangba agütsüogo

(Maneni tapak 11 nung...)

## Laishirtemi election nung shilem agitsü KHRISTAN YIMSÜ ANEMBA TELOK DEN AMALITEP MALITSÜ

**Mkg. May 29 (TYO) :** Ao laishirtem ajaki Nagaland Baptist Church Council aser Ao Baptist Arogo Mungdang-i ayongba 'Clean Election' sentong nung nungita yaritsü aser election mapang laishir shiai pei temeten vote agütsütsü lemtetogo.

Iba telemtetba ya Longmisa yimtak Ao Theological Association (ATA) 31 buba kiumsem inti mungdang May 26 nungi 28, 2017 tashi aliba mungdang nung lemteta liasü. Aor laishirtemisa kasa mungdang nung "Political party kobaixa Khristan tamangba yimsü tesayuba anemer, parnok denji amalitep makatsü," ta ajangajanga pangzung kuma lemtetogo.

Iba Deobar temoatsü sentep sentong nung "Tsungrem den ochi nung litetba" onük nung Wb. Tsukungsangba, Principal SBC-i jembia liasü.

Iba Deobar temoatsü sentep sentong nung "Tsungrem den ochi nung litetba" onük nung Wb. Tsukungsangba, Principal SBC-i jembia liasü.

"Ochi makaba tenzükra pa mesüra la asoshi ayanger ka dang aser konang asoshi dang tenzükra ka asütsü, koba ajanga temoatsü masü saka Tsungrem nungi atakatem bendenloksü," ta pai tekümdangtsü o shia liasü.

"Asenoki Ochi nung tenzükra asen Tsungrem kilir akümer aser iba ajanga Khrista den arok amalitepa inyaker ka kuma nüngdak ajak Pai agüja nungloksüba mapa nung tejang tanga takok angur. Anungji ochi tanelaji agizüka Tsungrem tsüngdang sentsü metsü tenzükdi," ta sayutsüngir Tsüknungisa ayongzük.

Kasa sentong nungsa Kibuba Benjung chiyongba mapang Mokokchung Town Baptist Arogo nung sannüker Rev. Ponen -i achaayanga agia liasü.

Deobar nikongtsütsü tatembangba sentep sentong nung ABAM Executive Secretary, Rev. Dr. Mar Atsongchancer-i "Ochi nung litetba kibong" onük nung jembia liasü.

(Maneni tapak 12 nung...)

## Tanü nungi NSF 31 buba Lokti Mungdang tenzüktsü

**Dimapur, May 29 (TYO):** May 30, 2017 nikongdang nungi Tzurang Valley nung Naga Students' Federation (NSF) 31 buba lokti mungdang tenzüktsü.

Iba mungdang atema omenji "Amelioration" lir aser May 31, 2017 anepdang sentong nung Union Minister for State Kiren Rijiju-i tongti tesemdanger asütsü.

Taküm küm NSF mungdangji Nagaland Chief Minister-i 'chief host' ama shilem agia, Ao Kaketshir Mungdang(AKM)-i ketcangsüa amungtsü.

Mungdang nung linük aser bendanglen nungi teshimetit nübo aser tetushi süa jaoker nisung 2000 jungnúa adentsü imlar aser nisung meyirijang asem mentetba mungdang ki ka renema lir.

Iba mungdang atema sound system aser stage lightings dak sendakba maparen Zip Sound, Dimapur nem lemzüktsü aser parnoki one lakh watts sound system renemogo.

NSF 31 buba Lokti Mungdang ya Tir Subenthung Kithan aser Tongti Tezülür Boveio Poukai Duo lenisüba kubok agitsü.





Mokokchung, May 29, 2017: May 29, 2017 nü 44 Assam Rifle Mokokchung-i nungita Care and support Society (C&SS) Mokokchung-i Mokokchung distict kubok Chuchuyimpang Baptist Arogo nung people with disability (PWDs) nem wheel-chair lemtsüba sentong agidang tangokba noksa nung angur.

## Kohima aser Dimapur nung 'World no Tobacco Day' amungtsü

**Dimapur, May 29 (TYO):** Tobacco Smoke Free Kohima Capital Convention Centre, Ambassador, Sievituo Solo natia Kohima nung May 31, 2017 jembitsü.

anüngdang 12:00 ako nungi Iba sentong ya Principal "Tobacco - A threat to Secretary, Health & Family Development" omen nung Welfare, Menukhol John leniba ajemdaker World No Tobacco day amungtsü, aser iba sentong Ano tanga osang ka nung, nung tongti tesemdangerji, kasa anogo nungsa Dimapur Higher Education & Technical Education Parliamentary Secretary, Deo Nukhu asütsü, ta ketdangser sangdong ka nung nunga World No Tobacco Day nunga Salesian College Auditorium, Dimapur nung amungtsü, aser iba sentong nung tongti tesemdangerji, Deputy Patti) nung nürurtem dang anti-tobacco documentary tem sayatsü, ta sangdong nungsa metedakja lir.

Kasa sentong nung Deputy Commissioner aser Kohima Comissioner aser Kohima DLCC Chairman, Rajesh Soundararajan IAS aser Officer, Dimapur, Dr. K. Vikato

Kinimi asütsü, ta tanü ketdangsertem sangdong ka nung metedaktsü.

Dr. C. Tetso-i okila jembitsü aser certificates lemtsütsü, iba dak alia sentong nungsa Inter College onük tetoktepba den kentenmenü alitsü.

Iba sentong ya Fr. Joe, (PNF) leniba nung agitsü.

Iba anogomung nüngtem nung District Public Relation Office, Dimapur-i tongtibang tesemtem (City Tower, Marwari Patti) nung nürurtem dang anti-tobacco documentary tem sayatsü, ta sangdong nungsa metedakja lir.

## Jubilee Memorial Education Merit Award 2017 agütsü

**Kohima, May 29 (TYO):** taküm nung takok angutsü atema Kohima Longjang Senso Telongjem, Jubilee Memorial Education Merit Award, 2017, HSLC 2017 sempet agütsüba sentong May 28, 2017 nü KLST Yim Ki (Agri Forest Colony), Kohima nung agiogo.

Lokti pelaa agizükba o jembidang Pangertoshi Pongan-i 1994 küm iba award tentetba otsü tongmelang agi metedakja liasü.

Paisa kaketshirtem dang, Takok angurtemi balala

meinyaker, saka parnoki yimya balala nung inyaker, ta shia paisa, kaketshirtem dang jenjang ajak nung meranga inyaktsü ajungshi.

Iba sentong nung kaketshir 14 nem Merit awards agütsü aser iba nungji HSLC tatidang 2017 nung jenjang 19buba nung takok angur, Longsener Longkumer nem special award senpet 10,000 agütsüba densema lir.

Item awards ya IPR Director, Limawati Longchar-i sponsor süa liasü.



Dimapur, May 29, 2017: May 26, 2017 nü Dimapur nung CHILDLINE Dimapur-i ayongzüka Dimapur District Hospital medical staff tem atema sensitization program ka katsüdang CHILDLINE Dimapur, Prodigals' Home Director, K. Ela-i jembiba noksa nung angur. Iba sentong ya Protection of Children from sexual offence Act (POCSO) 2012, section 27 kubok Chapter VI nung aliba ama tanur ka temang tendangtsüba dak sendakba nung Hospital aser staff tem shilem angatdaktsü nükjidong nung ayongzüka kaogo.

## World no Tobacco Day atema sangdong

**Dimapur, May 29 (TYO):** May 31, 2017 nü Dimapur nung World no Tobacco Day 2017 amungtsü sentong aliba dak sendakba nung District Tobacco control Cell, Dimapur-i school ajak dang iba anogomung nüngtem nung sentong balala ayonga akatsü metedaktsü.

Paisa school tem dang peipei school nung ayonga akaba sentongtem DTCC nem agüjang mesüra whatsapp ajanga Tobacco free institution group nem metedakjang, ta mepishia metedaktsü.

## BAN fellowship sentong akatsü

**Dimapur, May 29 (TYO):** Tang mezungbuba official BAN Christian fellowship (BANCF)

nung adentsü atema Business Association of Nagas (BAN) züngsemtem aser parnok kibongtem jaoker, ta BAN Tir, Thungbemo Murry aser General Secretary, Dr. Khekuga Muru nati sangdong ka nung metedaktsü.

Iba fellowship ya Mongolbar, May 30, 2017 nikongdang 3:00 ako nungi Covenant Church, NMM Building, Duncan nung

Tanü nungi Maternal & Child Health awareness akatsü

**Kohima, May 29 (TYO):** Vivor, Kohima nung akatsü.

Tetenük sentongji May 30, 2017 anüngdang 11:00 nungi agitsü aser iba sentong nung tongti tejaokerji Nagaland Health Minister, P. Longon asütsü.

## Taoba Tuli ADC den tepila sentong agi



Taoba ADC Tuli Wb. Sentiwapang Aier (tiyong) den Tzudikong Ad-hoc Town Committee Care taker Vice Chairman aser Secretary nunger tangokba noksa nung angur.

**Dimapur, May 29 (TYO):** May 23, 2017 nü Tzudikong Ad-hoc Town Committee (TATC) Care taker Vice Chairman aser Secretary-i, Tuli nung ADC inyaka lia Govt.-i Industries & Commerce department nung Joint Secretary inyaktsü lemzüksüsang, Wb. Sentiwapang Aier den tepila sentong ka agia, pai küm asem ADC inyakdang nürur tajungtiba nung tenzuka aruba atema pa nem tapet tetushi aser tenüngsang agütsüogo.

Ano talisa, Tuli Marathon aser Night Carnival sentong amala shisateta inyakba atema pa nem tenüngsang agüja liasü. Tang nungi tenzuka state yimtiba, Kohima nung lokti tuluba den inyaksema aodang nürur asoshi lenmang tajung sayuteter ka süjangni ta moaja iba sentong tembangta liasü, ta TATC Care taker Vice-Chairman, O Benjung Jamir aser Secretary, L. Chuba Jamir nati sangdong ka ajanga jenjangi ajungketja bendanga metedaktsü.





# TIR YIMYIM

## YIMOBILEM (EDITORIAL)

DIMAPUR TUESDAY, MAY 30, 2017

### NAGA NUNGER ATEMA MAPA

**N**agaland nung Naga nunger atema mapa inyaker meinyakma lir, anungji Naga nunger shinga mapa teinyaktsü makaba agi timtema sensakabo malitsüla. Tangarbo alu yimner saka ali maka, mapa mashi ka danga inyakner saka nütsüng onsaraba agi mapa agi matar ta asüba timtem aika lir. Ajisüaka, Nagaland nung alirtem asoshibo ali tuluka saka nütsüng ishika dang, anungji kechi inyakdir inyakaka ali nungsa inyaktsü asünungji, mapa inyakner asoshibo lenmang sadema lir. Atangji, Naga nungertemi junga meinyaktetba mapatem karbo lir, itemji yin aser longru amshia ki metentepa talang yangluba mapatem asütsü. Iba ama asenok sobaliba dak maketba mapa tasen kar dak alaka asenoki kanga junga inyaktettsü mapa aika lir. Item rongnungji alu ayimtsü, chiyongtsü yanglua ayoktsü, dokan amentsü aser gari anishitsü mapatem asütsü. Ajisüaka, tanübo asenoki inyaktettsü item mapatemji asenok aikati meinyaker, Ibaji mapa tasak asüba agia masü mesüra tajangzük maliba agia masü saka asenoki meinyaknuwa ajanga lir. Atangji, item ama asenoki inyaktettsü aser tajangzük aliba mapatem nung Naga nunger karibо kanga junga inyakdag. Naga nunger aikati süng agi tagitsü oset tapu balala yanglua kanga junga inyaker, sü ataker, süoshi arür, hotel aser dukan amener, shi aser ango ayoker, chiyongtsü tapu balala yanglur, alu ayimer aser gari anishir. Parnok jagi Nagaland nung rongsen yanglur aser anisüngzüka alir. Item jiluji ajizüka Naga nunger lanurtemi maparen tapu balala nung peisasa pei jangraba aser metetba mapa nguteta inyaktsü mapangji tang ya lir. Asenoki inyaktsü mapa aika lir ser nung asenoki meinyaknuwa agi kidang nu apongtsü aser surochiotsü nungi tenzüker gari anitsü, gari yanglutsü aser kiojen yanglutsü mapa tashi tangar nem inyakdaktsür. Aji oda, mapa inyakerbo chiyongtsü Tsüngremi moatsür saka mapa meinyakerbo chiyongtsüa mangu ala-ashitsü alinungji, tanü kidang kiburtem dang nungi kilarinem tuluba aser takarbo kümogo. Iba ama tiaji rajema tanü nungi tenzüker tang danga Naga nunger lanurtemi mapa inyaktsü maaki nümadangdanga pei akok mapa inyak tenzütsüla. Aji oda, mapang talangka endoka kaketshisatsü mebushiyonga aser sen aser mapang endoka mapa mebushiyonga Naga nunger lanurtemi inyaktettsü ana nung mapa aika lir, item rongnungji mapa kaji taxi aser auto rickshaw anishitsü mapa ya asütsü. Ibayongji, taoba hopta nung asenoki iba osangkaket nung " Nagaland nung senzüba taxi aser auto rickshaw ajak ya Naga nungertem dang anitsüla ta ozüng kuma latet nunga koma sula ?" ta asüngdangba nung telangzüba bushia bilemdangogo. Atangji, Nagaland nung taxi permit agütsüba aser auto rickshaw amshidaktsüba ya government nükjidongbo Naga nunger lanurtem nem mapa agütsütsü asoshi lir. Ajisüaka, Naga nungertem aikati taxi aser auto rickshaw mamshiner. Naga nunger lanurtemi jangrabaji kecha meinyak ser pei tsürabur gari nung mener chiajema senzüner. Iba jagi tsüraburtembo takar saka chinurtembo sensaker ta tenük agi ngua kibong aika tajemzük tiai aluba angur. Iba ama kibur agi peisasa alar akümba tia nungi tanübo peisasa nüjiso akümtsüla. Pei taküm alar kümér aliba tia nungi nüjiso akümtsü asoshibo tangari salatsütsü masü saka peisasa salatsüla. Atangji, tanü yangi lemsatepba tebilemtsü onük ya ajaki angateta lir saka meinyaker, kechiyong asenok aikati mapai mao government ita sen chinür, ano karibо mapai orr sen talila adjust süa agitsü atema government mapa nükshir aser ano karibо mapa meinyak ser givernment nungi subsidy agia linür. Ajisüaka, iba ama bilembaj peisasa pei külakoktsüba mapa ka asütsü, kechiyong item mapa jagi shinga azükaru masütsü. Asenok tia majung mapa inyaker chiyongtsü yimya mesübaba agi mapa inyaktsü aaker saka meshimetsütsü maaker. Iba tia nungi nüji akümtsü asoshi government-ia kechisüdir süaka inyaktsüsa ozüng kar latettsü nüngdaker. Item ozüngtem rongnung Nagaland nung Naga nungeri manishiba taxi aser autorickshaw-tembo mesenzüdaktsütsü ozüng ka latet asübo, Nagaland nung mapa inyaktsü industry tuluka lapok amai sula.

# OLEMSABANG

## NAGA NUNGER AJAKI YA KEN MEDEMDANGDI

- I.Meren Lemtur, Tzüdkong

May 25 Hokolbar nü Assam aser Arunachal na tsüngda linük nung apu talangtiba Dhola Sadiya apu lapoktsüba angudang, Naga lima Khristan asoshi ta ajaba tamanger lima yabo koleni aoer ta tanü tangar chiyungba ngur tebang ajak konga metsüa meyuka shisadanger. Tangarbo linük ana tsüngda Tzüyim tulu agi menguteti aliba kilometer 9.15 tsüngda akhi mapang ghonda terok indoka rongnung timtimseta ainlen jajaa aruba tangbo ghonda ka dang indoka jajatsüa ali nungi ajungketer anak aowia metui senzütettsüa lenmang Küm 7 tashi nungbo Mumbai nung aliba apu dang nungi talangtiba tesüngmangtsü mapa inyaktetba ya Naga nunger Minister,MLA aser deptt- balala nung tulurtem,ano nütsüng nüburtem ajaki ken aroka shisadangang. Aa shisatsü mulungsentsü atenba kin, A.Shin:11:22 Ak tenitepong nung hon keri ama teshisadang makütba ta züluu lirji, kechiba ni Azübo metetshir ta süra azüibo kiburi kechi koma sayur shidak angazüka tashi anga-a kidang alir, Azübo asenoki kidang O ajak angateta ayur. Saka tanü asen Naga nungertem yabo azü dang nungi teküpokba jenjang nung tanü tashi mangateter. Tangar limabo ali nungi ajungketta state balala linük ana tsüngda ali nunga masü, saka apu nung jajatettsüa yangluteta nüpurtem oda Kotaka atung ama pelatep dang, Naga nungerbo ali nung danga ghonda asem, pezü jajaba lenmang repraangju, tangar bendangeri ya ango tzübo asü, tzülu mo atemtsü ta rataa bilemtsüa tia nung aliba ya Naga nunger tuluba nungi tilaba yimtsüng nung aluyimer tashi agi ken aruka bilemdangtsü mapang tongogo. Ano dang tashi nung tenemtsüng lenmanga merenemtetba ya koda ta bilermer.

Tang aruyaa aliba election dang yabo temerük election ta sur agitsü tayongzükba tulu lirji, asenok nübor tema koma bilema lir? Tesüiba küm election nung gari 2nd hand ka aliteta küm ka ana benshir tanaben yanglushitsü sen maka nür kima apudaka aliba gari tu ano clean election arur külenang candidate-tem dang nungi sen meshizüker tanaben yanglur amshitsü ta terenemba ali asü? Mesüra clean election tenüng nung ki oset ang kar alitsü sentong yanglur atar asü? Naga nunger minister, MLA-tem oda tanga lenmangtem ya toktsü anogo shia pei senzüba Kohima nungi Dimapuri aluba lenmang angsüng meyanglutetba yimsüsür, Ak-i pei chiyungba auso nung pei süh, natzü enokba ak den kecha tepila mali, nisung shisatsü matenba yimsüsür. Lokti balala sentong nung na tongti tejaoker jaoka yimjak nung nai O jempiba angadangbo, Kotak nungi Tsüngremi tenya-a jembidaktsür ama nokdaker nümadangaa nokdaker jembiteter, rongsen nung ochishia alitsübo nai jembir, saka nai jembiba ama nai mapa agi sayua militeter nung ochiba Tsüngrem metsübur no!

Alima nungbo O tajung ta asübabo ajak yimsüsürtemi nübor tem ajak puadakja jembiteter, nai nübor tem matsüngdang nokdaker sayusüngiba, aser mapa tajungtem inyaktsü nai nangzüktenba ya nai shidak inyaktsü asübo tanü tashi nung Nagaland ya yamai alitsüba na ta nai shisadangang. Joko Naga nunger nübor temi asen lima ya ken yangludi ta shisatetra, election inyakyim ya melenshia aotsü nüngdaker. Candidate-tem dang na election nung adoker onok asoshi item ya inyakjang ta masü, saka nai tamasa onok asoshi iba mapa ya inyakjang süra onoki na shimtetsü ta asütsü nüngdaker. Yimya agia kechi mapa inyaker, tamašaba mapaji inyaker anogo tatemi kiburi asen taaji agütsür. Yamaji ka asen nübor angateta temelensi ka bener arutetra asen lima ajungtsü, saka akhi yimya nungsa election ya agira kodanga asen limai temelensi marutettsü. Naga nunger yimsüsür aser tulurtem, joko na ali agia periogo südi, RCC ki atungtepa asüba agia periogo südi, süngu lu, rubber lu aser farm balala agia periogo südi, joko sen agia koba bank nungang rezüngä meyui moshia bendenogo südi, joko ojang dang süang, kechiaser na aser nür chirtem semchisemnur asoshi atakatem süngang ojang dang züngya züngkuang. Tatem nung Esaia 5:1-12 ya asen Naganungertem junga züngang aser melenshidi ta lemsateber.

- *Yimozülur dangi-*

### Literature ministry takok ngua inyakba

- Wt. Akümlila,

Christian Education Director, CTBA.

Ozü Christian Education Ministry taküm onok sasep nung literature ministry ka inyaktsü ta sarasadema bilema aliba mapang, tila tanur asoshi Wb. P. Alem Jamiri züluu 'Kotak Lenmang' kaket ajanga ministry inyaktsü asoshi lenmang ngutetba agi onoki bilemba dang tali takok tuluba ngua inyaktetogo. Iba kaket ya tila tanur alir kibong shia nung züngdaktsüba ajanga tanurtem temoatsü anguba dang masu tsüraburtem densema kibong nung tanur anitetsü asoshi lesson tulu angazükba ngua kanga pelar. Iba kaket ya onok tanurtem asoshi kanga temoatsü tulu liasu. Tanurtem lenjii oa iba ama kaket tajung züluu saka asoshi tezülur danga kanga pelaba shisemer.

Aji oda, onok nukjidong asangsang nung ataloktsüsa arogoy (Changtongya Town Baptist Arogo) onok nem senotsü peria agütsüba asoshi arogo dang kanga pelar. Tila tanurtem shisatsü lanu asudang, arogoy iba ama kaket tajung bener arua züngdaktsü ajanga parnok taküm piyong asoshi tangazükba tulu kaogo ta bilermer. Arogoy tanur asoshi mapa tajung aika inyaktsüba rongnung iba yaa kangasa tajung ka liasu ta nenshia pelaba lemsateper aser ajak asoshi Tsüngrem nem tenungsang agütsür.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

# TAMANG AGI TASHIDAK ANEPE

Mrs. MEYISONGLA, Rtd. Deputy Director Nursing, Kohima : Nagaland

(Maneni taoba adok nung)

A.Shin 17:22. Tepela molungjangji mozü tajung. Tepela molungjang nung tashidak kecha amongtsü makok. Amoi nanga aor chi nanga chiyonger. Temang anema alir. Azüh süngjema jajar. Tekolok süngjemdaktsür. Blood pressure aser shini ashidak ajunger. Tang shia aruba tashidaktem atema doctor temi mozü melen pelaa liang ta dang zülutsür. Item tashidaktem ya shisabulu tashidaktem dang lir. Pelaa melira tanepetsü kodanga mangutsü.(1) Pela liang. (2)Tangar timtemer dang meimang. (3)Nü sasa anepang ta dang zülutsür. Doctor Koenigi ashibaji asenok nisung shiai pei jakla, inyakyim, libaliro aser achiajem meteta lir. Majungbaji melenshir lira ajisa tajungba. Saka shisabulu alirtem tashidak tapu ajak bendener. 1980 küm Dr. Dale Mathew dangi temolungjang ashidak aketer ka pa dangi aru. Shirangsangi doctorba dang ashi, nai kü nem treatment agütsü medenzükang, arung anati küleme Tsüngrem dang pa teyari meshia sarasademdi ta ashi. Shiranger ka den sarasademsüji kanga taktsüka, pai kanga memolung tangari angashi ajema ola tela agi tanemi dang sarasadem. Tangbo Dr.Mathewi shirang aneptsü atema tamang sarasadem ya kangasa tongtipang ta ashir.

America nunger asangur ka car accident nung tetsüng kuksah. Hospital nung doctori tetsüngji meyanglushitetsü odang rangdok tajungba asütsü ta ashi. Iba asangur ya tamang kangasa tulu, par adianu 6 tebur dang liasü, parnok ajak jar lumia sarasadem (fasting prayer). Pa tamang agi tetsüngji merangdoki tanepetsü angu, idangji pai doctor dang tamang agi teret kusahpa Tsüngremi aneptsü ta kuli asü. Pa tenüng Mr.Dwight Einenhower. Tesülen pa America nung president aküm. Tanga lima nungbo yimsüsürtemi yamaji Tsüngrem dak tamang kaa yimsü asür.

Tetsüngji chanu ka küm 4 asüdang temokok teret teloktep nung tenu tena kisen sayidang na ajem ka agiang ta sur injection agütsüba ajem tejen kati ajemji songtema tuhoktsü. Ibaj infection sur temokok tuluka waka komosotsü atsüng, temperarure atur temang tsüka metar. Hospital nung temokok awakba nungi komosotsü asemen atsüdoktsü, mozü tapu aika agüjaka manep. Crystalline penicillin injection 16 tashi agüjaka majunger. Idangji sayutsüngir Rev. Shahoo sayutsüngir tajung ka Mokokchungi arua liasü. Kanga akseta pa dang sarasademsütsü mepishi. Panüji shiranger asem atema temoatsü sentep nung sarasademsü (lokti sarasadem). Laia maneni sarasadem 12:00 A.M shidak nung lasasa saker oja ni natzü anai aor ta shir jayayonga bathroom-i ayi. Atang ni ajunger yidi ta tedi ashi, saka lai oja Rev. Shahoo sarasademsüba agi ni anepogo, reprangang kecha mashir ta shia aji tajunger aküm. Par asem indang arogopur ajaki sarasademsü saka idangjibo la dang tanepetsü angu. La tamang kanga tulu. Tangar tamang kija masü saka pei tamangji kangasa tongtipang. Yisui tanur ajak meimer alima tanur ajak tanak aser temesüng ajak pa matsüngdang senti lir. Yisu tsüngdang tamakoktsü kecha maka.

Mongsenyimti nunger kiym lanur ka dak tekong nung cancer atok. Tanepetsü bushia hospitali ao. Tangaleni refer asü iba treatment aotsü sen mali motet. Iba nisung tamang kanga tulu, pai pastorba dang tenlaki lapoka ayutsü mepishi. Anügo shia süngolio tapu balala bendena tekong cancer ji leta shidok. Aser lemjenlemjen shia aser tenla kidang aonong shia lumia sarasadem. Pa sarasadem Tsüngremi angashi aser pa aneptsü. Ibai kangasa sayatenya mapa ka liasü. Pa bible aser theology mazüng, yimdaklir ka dang, saka Tsüngremi pa pastor inyaktsü mapa agüja police project ka nung pastor mapa inyaker.

Yacob 5:15. Tamang sarasadem agi shirangbaji anep

Luke 10:9. Idakji shiranga alir anepjang.

Habakuk 2:4. Temeshipur pei tamang agi alitsü.

Mark 10:52. Oang nütamang agi na anepogo.

Gal 5:5-6. Saka temeim ajanga tamangi mapa inyakbaji dang tongtipang lir.

Luke 8:25.Nenok tamang kong lir.Aser parnoki tsübuadok. Aser süngmangseta kati ka dang ashi. Ajangla mopungi aser tzüsem nati tashi angatsüsa iba nisung shiba?

Tamang agi sarasadem dang .

1.Tenük merem tenem.

2.Mokok aji tenem.

3.Yazu auyaba tenem.

4.Ashih külak tenem.

5.Chidiyungti tenem

6.Nüktapangta tenem

7. Tesemba tenem

8.Mesüng jemtetba etc nü molungjang nungi senshir or jena aor aser tanüla temeshi süngjangtem atanger.

Gal 5:22

Temeim, tepela, tesünep, taremzük, kumlitajong, tajung temolunglemtetba, ajemalu. Pei sasa azükba, item süngjangtem yagi nü tanüla anema lidaktsütsü aser meshirangi arishia alitsü.

Halliluya pa sangdi.

## ANO GO ABEN TSÜNGREM DEN

### TSÜNGREM O

"Aser ayongküm nung atemba süngdong, kobai pei tsüngküm nung pei tejang atanger, iba ama pa alir. Pa toa mazular, aser pai kechisa inyakdir azükurur."

- T. Ken 1:3.

Iba anogo tenzütsü ibai tobur tajung Lai tekong ka lir! Ibai azükuruba noksa ajunga lir. Kodangsa asenoki azükuruba indang jembir ibai tanga kecha nung mali saka O nung lir ta asenoki bilemtetsüla. O asoshi Tsüngrem tenüng sangang. Shibai o ji anepdang aonung shia shisadanger pa/laji temoatsü. O nung süoki ia shisadangba jagi pa/la teblemba, mapa, jakla, tema, telung ajak azükur. O jagi pa/la taküm sünga alir. Memerükba ajak O jagi shitoker. Yimya aser Tsüngrem tashi tanela nung angatetta akümer. Tsüngrem O jagi telunglen ajak merüktsür aser Tsüngrem temoatsü aittsu lemag sadema lapoktsü.

Shibai maneni O nungji tangloka alir aser Lai Oji shisa danga alir pa/laji ayongküm nung atemba süngdongji lir. Ayong ka dang masü saka ayongtem. Temoatsü ka dang saka ajak. Alima temoatsütem konga oaka kodanga merusepba Tsüngrem temoatsü pa/la alitsü. Aser tsüngküm shidak nung pa/la dak ajak ataloktsü. Menua malitsü. Tesama aser anüng akongba malitsü. Pai kongshiba ajak nung takok angutsü (Yihusua 1:8). Azünga aliba mapang ajak nung Oji züngang, bushiang aser shisadangang aser tepelaji ajidangang.

#### SARASADEM:

Oba Tsüngrem, temoatsü ayong kuma alitsü ni Nü O meima angazütsü aser mapa agi sayutetsü Nü taochi teyari künem kua. Amen.

## Indonesia nunger aikati Islam ya tiyazü ta angateta arudar



**Jakarta, May 29 (Agencies):** temulung nung kongshi" ta Kongkin-isa metedaktsü.

"Ni Tsüngrem indang tali metettsü merang aser Yisu Khrista kü Kümtetdakba ta agizük" ta paisa shisem.

Pai Khristan yimsü agizükba sülen, par kibongi pa tekolok meshitak akümer ta biley aser kobi melii pa Islam dangi meyiptsü ta parnoki tetenzük

nungbo imla saka lialia pa Khristan tamang takangba kuma ao, ta paisa ashi.

Sannüker Kongkin-i The Christian Post den phone ajanga sensaksemendang, par ministry-i Jakarta nung reshikangshi ajuruiba Khristantem yariri aser parnok indang otsü linük nung aser bendangle metedaktsütsü meranger.


"Temang nung shilem ka timtemra, shilem ajak timtemer" ta Kongkin-isa ashi.

Pa ya taoba mapang Muslim nunger ka liasü aser Osangtajung angashiba sülen par Yisu Khrista sülen anidaktsü mulungtet. Yisu-i tekümtet agütsütsü osang ajanga pa temulung nung kongshi, ta paisa shisem.

"Ni Islam yimsü sülen anidakdang teimla mali ta bilema liasü saka tatok meshira agütsütsü ta osang angashidan, kü dak teimla liasü. Ozü medemer ka dang nungi ni Osangtajung angazük aser par kibong indang kuli ngua kü

"Ni Khristan tamanger ka asüba agi jembirba masü saka tatalokba anguba agi jembir. Ni mapa inyaka senzüdang taoba mapang Muslim nunger asürtem Yisu sülen anidaktsü mulungtetba osang aika angazükogo. Indonesia nung Khristantem renloka odar" ta paisa ashi.

Indonesia nung Khristantem atema timtem ajurubaji sorkar ozüngtem aser tali bileyloka oa amangba Islamic tetuyubatem ajanga lir, ta paisa shisem.

**OLONG PAITEP # 4435****TIPLEN**

1. Tenung ajungket / Tushi  
3. Lokti menjendi / Mendi  
6. T \_ \_ \_ len  
7. Nüngshi / Nüngtem  
9. T \_ \_ \_ dak  
11. Tanidaker  
12. Tashiyim agi teka ai  
13. Naro ka tenung  
14. Idaki  
15. Süngdong-lidong malidak  
16. Magima

**LANGTSÜNGLEN**


- (5)  
- (5)  
- (4)  
- (5)  
- (4)  
- (7)  
- (4)  
- (5)  
- (4)  
- (5)  
- (4)  
- (5)  
- (5)  
- (5)
1. Tebur tebenjem mapang - (7)  
2. Inyaktsü hai haura aka - (7)  
4. Amua ao - (6)  
5. O \_ \_ \_ - (3)  
8. Süngjang teküp endok - (3)  
9. Anü ailen - (7)  
10. Shibang - (7)  
11. Jayajako / Tajatsü - (6)  
14. Ki \_ \_ sang - (3)

**OLONG PAITEP # 4434 TELANGZÜBA****TIPLEN :**

5. Ajak, 6. Wabong, 8. Taju,  
10. Oro, 11. Talila, 13. Likok,  
15. Laktet, 17. Yok, 19. Magi,  
21. Teyari, 22. Aiwa.

**LANGTSÜNGLEN :**

1. Tamet, 2. San, 3. Maru, 4. Soro,  
7. Tali, 8. Tila, 9. Jakla, 12. Akki, 14.  
Oagi, 16. Tapak, 18. Keyi, 19. Meru,  
20. Kin.

**ALOKBA KINUNGSÜ WARAKLAAJEB MANENER**

**Kidanger :** Hai tantsü.... ya kechi koda asü??? tanepbo na yamai ajeb manener...??? Kinunger adianu tajung kar asü-ama ajuru asü koda..???

**Warakla :** Ayyee... tokorashima.... Ner kapur Alokba suwaba kuna tanep raratep aser pai kü dang o tamajung.... nisungi anganütsüla masü-ka ashi..... iba o-jí angashir ni tejashi agi ajeberba ajaa....

**Kidanger :** Kooaa.. kechi komala o tamajung ka ashi'ar shiangjo...??? Ozü kapur Alokba ni jungjunga artsütsü'ar..., ya tajung-tazü masü'ar....

**Warakla :** Aaaassshiiii.... ni ado pai kechi o tamajung ka ashi'ar amaa-dok-ogo-jaa....

**Alokba :** Hai... Etsüngla... ano tang tashi ajeb manen kazür naa...??? Tangar danga taak-a maak-er no... ni mapai aodang jeba toktsür aoba ano tang tashi manener???

**Warakla :** Hai tambu... ado nai kü dang kechi o tamajung ka ashiba ajanga ni ya ajeber'ar ni süsü-süsü-a amaa-dok-ogo-jaa....hii...hii...hii...

*Lilir : L. Kika Pongener, Aoyimkum, Dimapur.*

**TANÜBO NAI LANGZÜANG**

Q. Tawa 2017 G7 summit koba linük nung liasü ?

- [A] Japan [B] Canada  
[C] Italy [D] Germany

*(Taruba adok nung onoki langzütsü)*

**YASHI ADOK TELANGZÜBA : August**

**Tepela Tasoba Anogo**

Tanur asoba anogo nung salém osang dan noksa angan adokdaktsümura - Tenung, Küm, School, Talidak & salém osang tejangga zöür, noksa (photograph - any size) ka dan ansog 3 mesüra 4 jela. e-mail : tiryimyim@gmail.com nung yokang mesüra Tir Yimyim Bureau tem nung agujang.

1. Tenung : .....  
2. Tasoba anogo: .....  
3. Küm : ..... 4. Class : .....  
5. School : .....  
6. Talidak : .....  
7. Salém osang : .....

**NAIA YA METETER MA**

**RAVICHANDRAN ASHWIN**

India nunger cricket asayar Ravichandran Ashwin-i 'International cricketer of the Year Award' naröküm CEAT Cricket Rating (CCR) International awards 2017 sentong akadang agizükogo. Ashwin-i taoba küm ka tsüngda nung wickets 99 tashi agia liasü. Kasa sentong nungsa Batsman Shubman Gill-i Young Player of the Year award angu. Pai India-England U-19 ODI series asayamung nung kanga junga asayatetba ajang iba narökümji agütsü..

**SUDOKU # 3548**

3	9	1	8	4			3	9	5	2	1	7	4	6	8
5							9	7	6	4	3	8	9	1	5
			5	9		8	2	8	1	4	5	6	9	7	3
			4			7		4	7	9	5	6	2	8	3
			3			1		5	2	8	9	3	1	6	4
9	5		3	2		6	4	1	3	6	8	7	4	2	9
8			6	3	5	2	8	5	2	6	4	3	7	1	9
			2	4		7		6	1	3	7	9	8	5	2
4	3		7	1	5		9	4	7	1	2	5	3	8	6

**OJANG LUTEP # 4043**

ANGJMEJABA	:	□	□	□	□	□	□	□	□	□	□	□	□	□	□
NUNGTISEMI	:	□	□	□	□	□	□	□	□	□	□	□	□	□	□
ANBK	:	□	□	□	□										
KDA	:	□	□	□											
DAKSENBA	:	□	□	□	□	□	□	□	□	□	□	□	□	□	□
SÜNGADANGYA	:	□	□	□	□	□	□	□	□	□	□	□	□	□	□
ANDG	:	□	□	□	□										
NGKAA	:	□	□	□	□	□	□	□	□	□	□	□	□	□	□
GAJUN	:	□	□	□	□	□	□	□	□	□	□	□	□	□	□
LÜTSANGZÜLA	:	□	□	□	□	□	□	□	□	□	□	□	□	□	□

**OJANG LUTEP TELANGZÜBA # 4042**

DEOBARNÜ TSÜNGREM KÜLEMBÄ KIJA AGIDANGBO TEKÜMTET MANGUTSÜ KOTAK KIKÜMBANG MATONGTSÜ

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tettürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



**Aries**

21/3-19/4

Nai takok aika ngutettsü südi, saka nü takok asoshi asüküm o jembiba ajanga na tajangzük mangutsü. Ajemalua aser süngjema alitsü merangang.



**Taurus**

20/4-20/5


Nai tangar den ola tulu adoka asüküm o jembitsü mebilemaka nü dangi mapang arutsü südi. Anungji na tasü itshiang aser nü takok osang tangar den lemsatepang.



**Gemini**

21/5-20/6


Tangar nem na temesüzükdahtsü aser nai mapang junga amshitsü merangang. Nai tangar den jembidang nü tejangraba tem lemsatepang.



**Cancer**

21/6-22/7

Nai tanü nür kinunger den o kümdanga jembiang. Nisung aikati süngjema alitsü bilemtsü, anungji nai parnok yimya metettsüla.



**Leo**

23/7-22/8

Tanü nü yimya kanga junga azüoka alitsü merangang. Nai yimya meshidaki amshira nü sasa na atema maaksü bena arutsü.



**Virgo**

23/8-22/9

Tanübo na kisüng ali tajungba asütsü. Akok tashi nai ki telung nung kazütsü sentong yangluang aser lendong timtem nungi jembua alitsü merangang.



**Libra**

23/9-22/10

Nai medemertem den külemi mapang indoktsü jangratsü. Nüngdak maliba mapang nung nai ola madok tajungba asütsü.



**Scorpio**

23/10-21/11

Tanü na ki telung nung kazütsü merangang. Rarapangsen madoktsüsa nai sentong yangluang, mesüra na mela mela lendongi ayitsü.



**Sagittarius**

22/11-21/12

Nü dak sasapela lira nai tanü tangar aika nem tesenep bener arutsütsü. Nüdak iba sempet melira tesüngjem tesem kar bushia yangji nü mapang indokang.



**Capricorn**

22/12-19/1

Tanü nai yimya tajung amshitsü merangang aser tangar nem tamajung tajitetedaktsü. Medemer den nü khuret lemsatepang.



**Aquarius**

20/1-18/2

Tanü nü anogo tesüngjem asütsü aser medemer kar-i na peladaktsütsü. Südoksünema kazütsü asoshi mapang tajung ta bilemang.



**Pisces**

19/2-20/3

Nai tanü mapa inyaktsü asoshi mapang tajung ta bilemang. Na meketa aliba nisungtem dak nungi tajung meimlatsüla.

## 70buba Cannes film benjungmong tembangogo



2017 Cannes film benjungmong nung takok angurtem

<b>Cannes, May, 29 (Agencies):</b>	tanabuba lir.	Mathieu Amalric - Barbara
2017 Cannes festival tembangogo. Film tajungtiba aser actor tajungtiba asoshi tetoktepba kanga sashia liasü. Film tem aika juri temi kanga tenüng sanga agizü.	<b>Takok angurtem yamai alitsü:</b> Palme d'Or: Ruben Östlund - The Square Gran Prix: Robin Campillo - 120 Beats Per Minute Jury Prize: Andrey Zvyagintsev - Loveless Best Director: Sofia Coppola - The Beguiled Best Actor: Joaquin Phoenix - You Were Never Really Here Best Actress: Diane Kruger - In the Fade Best Screenplay: Yorgos Lanthimos - The Killing of a Sacred Deer, Lynne Ramsay - You Were Never Really Here Camera d'Or: Léonor Serraille - Jeune Femme Short Film Palme d'Or: Qiu Yang - A Gentle Night Special 70th Anniversary Award: Nicole Kidman 2017 Un Certain Regard winners: Un Certain Regard Prize: Mohammad Rasoulof - A Man of Integrity Best Actress: Jasmine Trinca - Fortunata Best Poetic Narrative: Diane Kruger - Best Actress award angu. La 'In the Fade' film nung shilem atema iba award angu. 'The Beguiled' film atema Sofia Coppola nem Best Director award agütsü. Tetsürtem rongnungi Best Director angur rognung la ya	Best Direction: Taylor Sheridan - Wind River Jury Prize: Michel Franco - April's Daughter 2017 International Critics Week winners: Nespresso Grand Prize: Emmanuel Gras - Makala France 4 Visionary Award: Fellipe Gamarano Barbosa - Gabriel and the Mountain Leica Cine Discovery Prize for Short Film: Laura Ferrés - Los Desheredados Gan Foundation Support for Distribution Award: Fellipe Gamarano Barbosa - Gabriel and the Mountain SACD Award: Léa Mysius - Ava Canal+ Award: Aleksandra Terpinska - The Best Fireworks 2017 Director's Fortnight winners: Art Cinema Award: Chloé Zhao - The Rider SACD Award: Claire Denis - Let the Sunshine In, Philippe Garrel - Lover for a Day Europa Cinemas Label Award: Jonas Carpignano - A Ciambra Illy Prize for Short Film: Benoit Grimalt - Back to Genoa City


## Irrfan Khan Instagram nung denogo

**May 29, 2017 (Agencies):** Irrfan Khan shiba social media tem nung pa onüktem kanga dang sangraa aser asaya menü keta post asüba atema nüngtugu lir, pa tawa Instagram nung densemogo.

Pai Instagram nung mezüngbuba noksa inoktsübaji pa tanru asüdang tangokba noksa ka liasü, koba nung pa Sholay film nungi Veeru ama renemer nüngtugu Jai-Veeru pose nung tangokba noksa ka lir. Tanabuba noksajia pa tanur asüdang kor nung sanger tangokba noksa ka liasü.

Noksa den külemi pai caption yamai zülutsü, "actor ka akümtsü asoshi kor nung asang ashitsüla ta nisung kari ashi...anungji kodangsa ni kor nung sangdir kü tereprangtsüji Rajesh Khanna tangokba yim nung tangoka liasü.."

Item noksatem ajanga Actor-i maneni pa tanur asüdang tangokba noksatem aser pa actor akümtsü asoshi ajungmesoba onüktem lemsateptaü imlar.



## TAN HOPTA ATEMA - KOMA SÜLA ?

Q Central government-i Nagaland nung nashi maleptsü aser shibelen mesüdaktsütsü asoshi army nem tashi agütsü nunga koma süla ?

Olong 20 shi nung June 02, 2017 tashi nung iba telangzüba ya onok dangi

e-mail - tiryimyim@gmail.com mesüra SMS - 9856121232 / 9436072422 mesüra Tir Yimyim Facebook account ajanga yokang. Telangzübatemji taruba Hokolbar nü adoktsütsü.

## Priyanka Chopra nem Dadasaheb Phalke Academy Award agütsütsü



**Mumbai, May 29 (Agencies):** Dadasaheb Phalke Academy Award nung tetendangertemi sempet tasen ka inoksema, Internationally Acclaimed Actress Award ya nüngtugu actress, Priyanka Chopra nem agütsütsü.

"Hao, onoki sempet tasen ka agütsütsü renemogo - Internationally Acclaimed Actress Award. Priyanka Chopra nem iba sempet agütsütsü temsüa lir. Lai-a iba sempet agizüksü molungogo," ta Dadasaheb Phalke Award committee nung mendenbuba, Ashok Shekhar-i osangbener dang ashi.

America nunger television series, Quantico nung Priyanka-i itangiter, Alex Parish tenüng nung shilem agiba ajanga alima ajunga-i la meteta aküm. Quantico ya Season 2 nung jenjang junga mongutetaka ABC Network ajanga ano küm ka atema yanglushitsü lir. Lai maneni Hollywood nung nüngtugu nisung, Dwayne Johnson aser Zac Efron nunger den Baywatch nung shilem agir.

"Lai India tenüng nung 'global level' tashi nung shilem tajung agiba ajanga India nunger ajunga asükumtsüsa

mapa inyaktet. Iba ajanga sempet tasen ya agütsütsüa aküm," ta Dadasaheb Phalke Academy & Award Committee mendenbuba, Ganesh Jain-ia ashi.

Marathi indang Ventilator film nung mezüng shilem agiba nung Priyanka Chopra tetsü Madhu Chopra-i Best Film category nung sempet agizüksü.

Iba sentong nung Anil Kapoor, Kapil Sharma, Juhi Chawla aser Nitesh Tiwari nungertema arua adentsü imlar. Iba sempet agütsüba sentong ya Mumbai nung June 1 nü agütsü.

Priyanka Chopra ya India nunger film industry nunga kanga nüngtugu lir. La ya Aitraaz, Barfi, 7 Khoon Maaf, Fashion, Bajirao Mastani aser ano tanga film aika nung shilem agia lir. Lai Padma Shree sempet ka, Filmfare sempet pezü, National Award ka, IIFA sempet trok aser People's Choice sempet ana ngua lir.

## Microsoft puri yakta Data tem DNA nung rizünga ayutsü



**May 29, 2017 (Agencies):** rizünga ayutsü asoshi Microsoft puri taruba küm 10 lenmangtem asadangdar, ta tsüngda nungbo parnok indang data DNA amshia rizünga ayutsü asoshi sentong aliba osang ka, company computer architect temi metedaktsü.

Osang balala rizünga ayutsü asoshi tang tashi nung dalangtiba aser tajungtibaji 'magnetic tape' lir koba ajanga tesem kanga ajema agir aser osangtem küm 30 tashi rizünga yutetsü asoshi tashi lir.

Ajisaka data tem kang aika akumba ajanga 'magnetic tapes' tema kangabo tagidak makai akümer. Anungji Microsoft computer architect temi biological material; DNA amala amshi digital information tem

nung osang 215 petabytes (215 million gigabytes) rizünga yutetogo.

Ajisaka 'nucleic acid sequence' yimya nung data rizünga ayutsüba nung scientist tem atema tetsükdaktsü adoker. Company ajanga yaküm process ka nung DNA base 4 nung data megabyte 200, literary classics 100 ama encode asüba DNA data storage technology ka sayaa liasü.

"Shishilembadak anguba material tem amshia iba process nung sen \$800,000 shi indokla, anungji iba ya sen meyirejang aika agi tajemba nung adoktsü nüngdaker," ta kasa osang ajanga metedaktsü.

Maneni DNA strand nung data rizünga ayuba speed ya second shia 400 bytes liasü koba company atema second shia speed megabytes 100 shi agütsüttüsü yanglutettsü asoshi tetsükdaktsü tanga ka lir.



Mumbai, May 29: Honibar aonung Marathi film Hrudayantar sayaba mapang Bollywood actor Hrithik Roshan, Marathi actor Sonali Khare, Subodh Bhave aser Mukta Barve nunger tangokba noksa nung angur.

## Judy Malware-i Android amshir million 36.5 dak kongshi

**May 29, 2017 (Agencies):**


Tawa Ransomware ajanga Microsoft Windows aika nung kongshiba sülen anu malware tasen ka adoka Google indang Play Store ajanga prokshir.

Iba malware tenüng ya 'Judy' lir aser iba ya Google Play Store app 41 dak tali nung lir. 'Judy' ajanga Google Play Store amshir million 8.5 nungi million 36.5 dak kongshio.

Judy malware ya security bushisüngdanger telok, 'Check Point' ajanga ngutet aser iba osang Google nem metedaktsüogo. Iba malware ajanga kongshir aliba app tem Google ajanga Play Store nungi indok tenzükogo saka item app tem ya million 4.5 dak tali download süogo.

Check Point ajanga ashiba agi, Judy malware ya Google indang app nung 2016 April nungi liasü.

"Iba malware aliba app ya kanga kera züina aor aser tang tashi nung million 4.5 nungi million 18.5 tsüngda nung




download süa lir. Iba app ya Google Play Store nung aliba ya küm isheka tejaklen nungi liasü saka tawaang tasen kuma yanglushi," ta Check Point ajanga ashi.

Judy Malware ya South Korea indang firm, Kiniwini ajanga purapitet südi, ta amanger. Iba malware ajanga ads nung 'auto-click' süa sen bidentsü nükjidong nung yanglu.

Bushisüngdanger temi ashiba agi, Kiniwini ajanga Google Play Store nung ENISTUDIO corp tenüng amshia lir.

Iba malware aliba memeteti Google Play Store nung küm ka dak tali yutsüba asoshi Google nem tenüng tamajung bener arutsür.

## Actor Geeta Kapoor lar chirnuri sendok



Geeta Kapoor (File)

**May 29, 2017 (Agencies):**

Kanga dang temolung shirangtsü osang ka nung taoba mapang actor Geeta Kapoor temang anepalutsü asoshi Mumbai nung mozuki ka nung admit asüba sülen lar jala jabasotemi la sendoka doktsü.

La-i nüngtugu film Pakeezah aser Razia Sultan nunger nung shilem agia liasü.

Actress ya SRV Hospital nung joko ita ka shi amonger aser la medical bill lakh 1.5 dak tema kümogo, ajisaka lar jabaso Raj Kapoor shibai la April 12 nü mozuki nung anioka doktsü pa osang tang tashi kecha mali.

Raja dang mozuki nung sen agütsütsü asoshi ashiba sülen pa ATM nungi sen agizüki aor ta shir ao saka meyipa maru.

Sen magütsüaka mozuki nung doctor temi Geeta temang maneni dang anepalua liasü, kechiyong la temang mejungi liasü.

Mozuki nungi Geeta'er jabaso Raja aser jala Pooja den tongteptsü asoshi kanga merang

saka parnoki merangdanga amajok dang liasü.

Tawa osang ka ashiba shidak süra Raja ya par kia doktsüogo aser phone dena magizüker.

"Pai kü dak mapangshia züka liasü kechiyong ni pa yimya magizükteti liasü. Pai kü nem anogo pezü nung chiyontüsü khen dang agütsüa liasü aser khen khenbo anogo aika kidang shibangasa ayu. Ni old-age home nung alitsü asoshi renema meliasü iba lagi pai iba sentong ya adong. Pai ni asaa yaseta doktsü aser iba ajanga ni temang mejungi aküm. Iba sülen pai ni mozuki nung anioka doktsür jena oadok," ta lai ashi.

Osang tanga ka ajanga ashiba agi, producer Ramesh Taurani aser Ashoke Pandit nati la mozuki nung indokba sen agütsütsü asoshi achaayangogo.

Osang ajangasa ashiba agi mozuki Geeta'er chirnurtem bushitsü asoshi police nem ken o ka agütsüogo.



New Delhi, May 29, 2017: Hombarnü New Delhi nung on 66buba North Eastern Council senden nung Minister of State for Development of North Eastern Region (I/C), Prime Minister's Office, Personnel, Public Grievances & Pensions, Atomic Energy & Space aser North Eastern Council (NEC) Chairman, Dr. Jitendra Singh-i jembiba noksa nung angur.

## Chiyungtsü achitsü atema Centre-i lemtettsü makok: Mamata

Kolkata (West Bengal), May 29 (Agencies): Hombarnü West Bengal Chief Minister, Mamata Banerjee-i Modi-i aniba Centre sorkari aija, sorkari nashi tepsettsü nokdangbaji linük temzung den mapet aser iba tetuyubaji secular aser federal anema lir, ta ashi.

Hombarnü Kolkata nung osangbenertem senden ka nung jemidang lai, "Ozü sorkari ozüng nung ajemdaker iba tetuyuba anema raratsü, kechiyong iba ya ajanga linük federal inyakim raksatsütsü meranger," ta ashi.

Trinamool Congress tongti lenir, Mamata-isa, "Onoki chiyungtsü achitsü?, ibaji sorkari lemteta yutsütsü makok, aser ni Centre dang iba nung yabo mejangjontsü mepishir," ta ashi.

Lai ashiba agi, iba onük nung la tangatetbaji secular party tem ajaki pusemer aser iba telemtetba anema lai oziung nung ajemdaker raratsü.

"Onoki Centre sorkar telemtetba nung manidaktsü. Iba onük ya concurrent list (Linük temzung kubok Seventh Schedule) nung lir. Onoki kechi achitsü mesüra kechi sobutsü? Ibaji lemtettsüsa parnokji (Centre) shiba?" ta lai asüngdang.

Linük Temzung Arrla 246 nung ajemdaker Mamata Banerjee-i, iba ama onüktem nung (schedule VIII nung list 2) ozüngtem yanglutsü atema state sorkar tem nem temeten agüja lir, ta metedaktsü.

"Secular party tem ajaki iba telemtetba anema nokdaker," ta lai ashi.

Ano Muslim nunger benjung, 'Ramzan' atongtsü anasa, May 23 nü ang Centre sorkari iba telemtetba agiba atema lai Centre dang tasüngdangba kaa jembiogo.

"Ni sünglio/ süngdonglidong dong meimer. Süngdong/ sünglio tema taküm alir. Karibo, asenoki alo aser tanga

aonsotsü melensüla ta ashitsü akok. Alu nung mo atoker aser asenoki ibaji rangzüka iba nungjagi jang rüzüker. Süra ibaji-a nokdangtsüla," ta lai ashi.

Iaisa, iba telemtetba ya linük temzung den mapet, ta ashi.

Centre-i democracy den

asayamenü masütsüla aser linük indang federal inyakim meraksatsütsüla, ta laisa ashi.

Yashi Kerala sorkaria Centre telemtetba aija, parnoki oziung nung ajemdaker iba tetuyuba anema raratsü, ta sangdongba sülen anogo ka lir tanü WB CM, Mamata-ia kasa o jembiogo.

Centre nung BJP-i aniba NDA sorkar aser RSS aija Kerala Chief Minister, Pinarayi Vijayan-i, state nürburtemi chiyungtsü achitsü atema New Delhi mesüra Nagpur (RSS headquarters) nung alirtem dang nungi angazüksü menüngdak, ta yashi metedakja liasü.

## Cong Youth-i yimjak nung nashi tepsetba tatalokba aitsür: Rahul

New Delhi, May 29 Gandhi-i aitsüogo.

(Agencies): Tawa Centre sorkari linük nung nashi tepsettsü atema ayokba nokdangba anema Kerala nung Congress Youth-i longkak inyaker lanur kari yimjak nung Party-i magizükteter. Ni iba nashi ka tepsetba tatalokba tatalokbaji aitsür," ta metedaktsü.

Tanü Congress lenir, Rahul-i twitter ajanga, "Yashi Kerala nung kechi atalokogo, iba tatalokbaji meshisadangi inyakba mapa ka lir aser iba tatalokbaji ni aser Congress

Party-i magizükteter. Ni iba tatalokbaji aitsür," ta Keraka Police-i Youth Congress nung inyaker kar puogo.



New Delhi, May 29, 2017: Hombarnü New Delhi nung International United Nations Peacekeeper's Day anogomung sentong nung Vice Chief of Army Staff, Lt. Gen. Sarath Chand-i okila jembiba noksa nung angur.

## Demonetisation dak alaka Modi sorkari tasen kecha meinyak: Sena

Mumbai, May 29 (Agencies): Centre nung BJP den teloktep party, Shiv Sena-i, Narendra Modi sorkari taoba mapang UPA sorkari tenzüka yutsüba project tem dang lapoktsü aser nüngjatem ang melentsü, ta aitsüba den külemi Modi sorkari küm asem tsüngda demonetization dak alaka tasen kecha meinyak, ta metedaktsü.

Shiv Sena ya NDA teloktep nung densema lir, aser tanü parnoki, demonetization ajanga sensakertem aser aluyimertem tamajungba kongshiogo, süra sorkar küm asem ajungba benjungmung nung parnoka adeneri asü? ta asüngdang.

Sen tamshidak anentsüba dak alaka sorkari tasen kecha meinyak, ta Shiv Sena indang osangkaket 'Saamana' yimobilem zülu ajanga metedaktsü.

Sena-isa, "Taoba sorkari (Congress-i aniba UPA)-i kanga tongtibang project kar tenzüka liasü aser itemji parnoki (NDA sorkar) lapoktsü aser nüngja kar dang melentsüogo. Aser item

project rongnung UPA sorkari Assam nung tenzüksüba Bhupen Hazarika Dhola-Sadiya apu aser Jammu & Kashmir nung Chenani-Nashri tunnel densema lir," ta metedaktsü.

Modi sorkari sen tamshidak anentsüba ajanga industry dak sendakba mapatem jenjang mejungi akum aser IT sector nung aika mapa makai aküm, ta Sena-isa metedaktsü.

Sen tamshidak anentsüba ajanga aluyimertem 'Kharif' tsünuba mapang nung loan magititi takoksa tulu nguogo, ta parnokisa ashi.

Demonetisation sangdonger ita trok jungogo, iba telemtetba ajanga district co-operative bank tem kongshia liasü, ta parnokisa ashi.

Sena-isa sen tamshidak anentsüba atema Reserve Bank of India (RBI)-a aitsü.

"Sensakertem kanga meranga inyaker aazükba sen tagidak makai akumtsüsa RBI nem shibai temeten agütsü?" ta Shiv Sena-i asüngdang.



May 29, 2017 nü New Delhi nung Victoria, Australia nung Health & Ambulance Services Minister, Jill Hennessy-i Minister of State for Health & Family Welfare, Anupriya Patel ajuruba noksa nung angur.

## Arunachal nung Dhola-Sadiya apu yangluba China-i ashishir

Beijing/New Delhi, May 29

(Agencies): Tawa Ato kilonser, Narendra Modi-i India nung apu talangtiba, Assam aser Arunachal Pradesh na sendakteba apu lapoktsüba sülen anogo ishika lir Hombarnü China-i India dang Arunachal Pradesh nung kanga kümdanga inyaktsüla, ta metedaktsü.

Chinese Foreign Ministry-i India nunger osangbener dang, "Arrtsülen yimjung aser tesünep alitsü atema India aser China tsüngda tatembang telemtetba ka magi tashibo India-i kanga kümdanga inyaktsü, ta onoki imlar," ta ashi.

China-i Arunachal Pradesh ya par shilem ka lir, ta jembir, aser iba state den Assam sendakteba apu yangluba China-i ashishir.

"China aser India nati arrtsü

mangatetep onüktem ya linük ana tsüngda ken o jembiba ajanga latettsüla," ta Foreign Ministry-isa ashi.

1962 küm China aser India na tsüngda mapang tatsüka rara adoka liasü, iba mapang nung China nunger sepaitem Arunachal Pradesh telungi aita liasü saka tesülen ceasefire yanglu.

Iba mapang nungjagi tenzüka India aser China sepaitem arrtsülen rara adoktsüsa aiben tejak chitepa arur.

China-i linük ana arrtsülen kiojen aser terenlok ampa balala inyaka arur. Ajisüaka India nunger mongintemi, tamalen ama rara madoktsü atema arrtsülen gari lenmang meyanglutsüla, ta ashiba ajanga India-ibo terenlok mapatem kangabo meinyaki arur.



TOKYO, MAY 29 : Tokyo, Japan nung May 29-nü Japan Ato Kelonser, Shinzo Abe-i osangbener den North Korea-i missile tendangba osang lemsatepba mapang tangokba noksa nung angur.

## Sri Lanka tzümetsüng lendong agi nisung 177 süogo



**Kalutara, May 29** mongudang," ta Kalutara district (Agencies): Sri Lanka mitkar nung alir arishi küm 62 tain, J. H. Siripala-i osangbener dang ashi.  
"Onoki tzü metsüng ya 2003 nunga nguogo saka tang aruba amai mongudang. Ozü ki feet 8 bo tzü aki metsüngbang," ta lanur kati ashi.

2003 küm May ita nunga iba ama tzü metsüng tesashi arua nisung 250 taküm sama aser ki 10,000 raksatsü.

Tsünglu aruba khen anenba ajanga anüng nung tayimtsü, rong aser ali nung mitkartemi yaria tzü metsüng ajanga kongshia aliba tesemtem nungi nüburtem tesem balala-i bener aor, chiyongtsü agütsür aser tasümag bushir.

Tsünglu tesashi aruba ajanga tzü metsüng arudakja anentsü aludaktsü aser iba ajanga Sri Lanka nung aliba nisung million tesadang ka pei ki doktsür tangai aotsüsa akum.

"Ni iba tesem nung küm 27 tashi alir aser onoki tzü metsüng aiben ajuruogo, saka tang aliba tzü metsüng amai kodanga

tayimtsü junga menenteti tsükok. Saka nisung asüba osang mali.

Iba lendong ajanga kongshir alir nüburtem nem nüngdakba chiyongtsü agüja teyari balala agütsü asoshi Sri Lanka sorkar-i mitkar 1,800, tzüyim nung senzüba mitkar 1,100 iba tesem-i yoka lir.

Iba lendong nung teyari agütsü asoshi Civil Defence Force nungia nisung 2,000 yoka lir.

Hombarnü nungi iba tzü metsüng taremba kümdar saka lenden lima nung bo kasa dang lir, ta sorkar osang ajanga ashi. Sri Lanka yimtiba, Colombo densema tzü metsüng agi kongshir aliba tesemtem nung kaket reju hopta ka shi shibangtsü totuyuba agütsüogo.

Sri Lanka nung tsünglu aruba tajemba kümogo saka Mongulbarnü Bangladesh aser India nung Cyclone Mora yagi kongshitsü süti, ta ashir.

Sri Lanka nung iba lendong ajurua aliba nübur nem teyari agütsü asoshi India-i rong tulu ana nung chiyongtsü aser nüngdakba osettem bener yokogo aser tasembuba rong ya tain hopta tsüngta nung yoktsü, ta osang ajanga ashi.

Iba lendong adokba sülen Sri Lanka sorkar-i linük ajunga dang teyari meshi. United Nations, World Health Organization aser Japan-ia teyari balala agütsütsü tzü metsüng ali nung iba nangzükogo.



MANILA, MAY 29 : Honibarnü jenjang aika aketba 'shabu drugs' seret 505 apuba sülen ketdangsertemi Manila, Philippines nung aliba National Bureau of Investigation (NBI) headquarter nung 2017, May 29-nü osangbener dang sayuba mapang tangokba noksa nung angur.

## Europe-i US dak dang metaloka malitsüla: Angela Merkel

**Berlin, May 29 (Agencies):**

US tir, Donald Trump densema agiba 'international summit' nungi ajangshiba dak ajemdaker Europe-i Washington dak dang metaloker malitsüla, ta ashi.

"Asenoki tangar dak dang metaloker alitsüba mapang tempangogo. Ibaji ni tang anogo eshika tsüngta nung ajangshio go aser ibayongji ni ashitsü agi, Europe nungeri asenok tia ya asenok kabo nung dang ayutsüla," ta German Chancellor, Angela Merkel-i ashi.

Paris climate ken o tezungzütep nung Trump-i marakzüi alitsü asoshi G7 Summit nung taoba hopta Merkel densema lenir aikati merangdang, saka tamakok alu.

G7 Summit tempangba sülen Trump-i Twitter nung iba ken o asoshi taruba hopta telemetba final agitsü, ta zülutsü. Tzümopung kümzüka ayutsü sentong yanglua aliba nung G7 Summit mapang US tebilemma balaka nung nokdak.

US, UK aser Russia den tembar ka ama Europe nungeri maparen ajak nung yaritepa aotsü saka Europe nunger ya pei sasa pei dak temolung lemteta alitsüla, ta lai ashi.

"Europe kisüngi tarutsü anogotem aser asen tia atema raratsü, ta angatettsü nüngdaker," ta Merkel-i ashi.

Taküm election nung lar teloki takok ngura Merkel ya Chancellor mapa nung term pongububa amentsü.



BERLIN, MAY 29 : Honibarnü India Ato Kelonser, Narendra Modi Berlin, Germany atongba mapang pa agizükba noksa nung angur.

## Tesayur-i tanur ka kilem kolak nungi nungzüka yok

**Lahore, May 29 (Agencies):**

Punjab province nung arishi küm 14 tain Pakistan tsür ka classroom meriktsü memolungba ajanga tesayur anati kilem kolak nungi nungzüka yok, ta osang ajanga ashi.

Iba lendong ya May 23 nung adalok saka school ketdangsertemi education department nem memetetdaktsü. Onoki iba lendong ya Deobarnü nikongdang ang angashi.

Class-IX nung azünger Fajjar Noor ya la taküm kümzüksü asoshi Ghurki Hospital, Lahore nung yaridagi. La temang nung teret kar jaksa aser tongtiret raksar lir.

"Tanü (May 23) ozü classroom meriktsü kü tata anogo asüba ajanga ozü tesayur Bushra aser Rehana-nati kü

dang iba mapa inyaktsü totuyuba agütsü. Ni temang majung asüba agi ni parnok dang tanga anogo nung inyaktsü ashi. Iba yongji parnoki ni takdang tanga kati anir ao aser kü dak amatsü tenzük. Iba sülen parnoki ni kilem kolak-i anir atu aser iba kilem meriktsü ashi. Ni parnok o langzüktepa rarerpeba ajanga parnoki ni kilem nungi nungzüka yok," ta Noor-i la nüji kuma arur osangbener dang ashi.

Iba lendong ya City District Government Girls School, Kot Shahabdin, Shahdara nung adalok aser tesayur ana ya nisung tepsetsü merangba ken o nung tenüng züluokogo.

Tesayur tain ana, Rehana Kausar aser Bushra Tufail-nati Fajjar Noor nem 'corporal punishment' mezüng agütsü aser

la ya school ki temaba (asembuba) floor-i anir tur nungzüka yok, ta Punjab Secretary Education (Schools), Allah Bakhsh Malik-i ashi.

"Iba lendong ya May 23 nung adalok saka school ketdangsertemi education department nem memetetdaktsü. Onoki iba lendong ya Deobarnü nikongdang ang angashi.

Departmental enquiry tenzükogo aser kasa osang ya Chief Minister Inspection Team nem agütsüogo," ta Malik-i shisem.

"Iba osang angashiba den küleme District Education Authority Chief Executive Officer, Ehsan Malik, Deputy DEO Tayyaba Butt aser Headmistress Naghma Irshad nunger ya iba lendong miimshiba asoshi mapa nungi khen atema anenja lir. Tesayur anaprong nem kasa temerenshi agüja lir aser parnok ajak ya Punjab Employees Efficiency & District Act kubok merenshitsü," ta paisa shisem.

"Malik-i onok semdanga onok den tebilemma lemsatepaka Chief Minister arua ozü jala temang reprangdangtsüla...la kanga tekangshi nung lir," ta Noor tetsü, Rukhsana Bibi-i osangbener dang ashi.

"Police temi parnok ki mita bushidagi, saka tang tashi nung nisung kata pua mali," ta police tanishir kati ashi.



Federer-i French Open masayatsü asoshi telemtetba agibaji kanga shidak: Becker



BORIS BECKER (FILE)

**May 29, 2017 (Agencies):** Federer-i pa May 28 nungi Roger Federer-i taküm French Open nung shilem magitsü asoshi telemtetba agiba atema Boris Becker-i pa tenüng sangogo. Pai ashiba agi, iba telemtetba agiba teteziyi Federer Wimbledon nung kanga tashi ita arutsü aser iba sayamong akoktsü imlar rongnung ka asütsü.

"Ni pa coach asünungbo

Roland Garros masayadakstsü asoshi merangdangla," ta yaküm June ita French Open nung Novak Djokovic takoki anisang Becker-i ashi.

Federer-i küm nung kecha tetsükdakstsü mali ta sayua taküm January ita Australian Open koka liasü. Iba sülen maneni pai Indian Wells aser Miami akok.

"Pa joko arishi küm 35 jungogo aser nibo tetenzük nungi Wimbledon madong tashi anisüngzük tajungba asütsü ta bilema liasü," ta Becker-i shisem.

"Pai French open masayatsü asoshi telemtetba agiba osang angashiba sülen, pai kangadang jenjang tajungka agiogo ta ni bilem. Pai taküm Wimbledon akoktsü kanga timla lir," ta Becker-i maneni shisem.

## Tang tensa nungbo India-Pak masayatsü: Sports Minister



Vijay Goel (File photo)

**London, May 29 (Agencies):** Alima nüburtemi ICC Champions Trophy 2017 nung India aser Pakistan na tsüngda asaya yongyaa atadang tanü India Sports Union Minister, Vijay Goel-i, tang ama tensa ka nungbo linük ana tsüngda masayatsü, ta metedaktsü.

Board of Control for Cricket in India (BCCI) aser Pakistan Cricket Board (PCB) ketdangsertem Dubai nung

ajurutepa tesendaktep indang jembiba mapang ka nung minister-i iba osang metedaktsüogo.

Kiralongrartemi India amakba nung ajemdaker 2012 küm nungi linük ana tsüngda masayar.

Osangbenertem den jembidang Goel-i, "Pakistan den mejembidang BCCI-i sorkar den tama jembitsüla. India-Pakistan arrtsülen tensa majung tashibo Pakistan den cricket asayatsüji tamakoktsü, ta ni jangjajangja shiogo. Ajisüaka multilateral events (ICC tournaments) ama nungbo onoki kecha ashitsü makok," ta metedaktsü.

2015-2023 tsüngda linük

ana tsüngda series pongu asayatsü aliba atema nangzükteba ama meinyakba asoshi PCB-i BCCI anema


US sen million 60 (India sen crore 387) jenjang ken o agütsüogo.

Osang angazükba agi, Joint Secretary, Amitabh Chaudhary leniba nung BCCI ketdangsertemi PCB ketdangsertem dang, sorkari temelaba magütsüibo iba series mesyatettsü, anungji ken o aliba agiendakstsüner, ta mepishia metedaktsüogo.

Linük ana tsüngda tesüsabuba asayaba series ji 2012 küm December ita nung liasü, aser iba mapang nungji Pakistan team-i limited overs series ka atema India semdang. Iba nungji One Day Internationals asem aser Twenty20 Internationals ana dena liasü.

Yaküm ICC World Twenty20 nung India-i Pakistan koka liasü.

## Laishirtemi election nung shilem... (TAPAK 1 NUNGI...)



Iba mungdang nung Ao Baptist Arogo nungi laishir ajak agi 610 shi dena liasü.

Iba mungdang sentong temenungratsuka Artang Baptist Arogo laishirtem ajanga "ne tesangwa amang dakji oa yalokjang" ta ayongzüka Rev Dr. Mar Atsongchangeri tempang.

Ao Theological Association 32 buba kumsem inti Mungdang 2020 küm Longkum Baptist Arogo nung akatsu, anungji züngsem ajak taküm tajung lia

iba sentong nung tentettsü asoshi sarasadema atadi ta ATA k e t d a n g p u r t e m i metedaktsüogo.

Ano, taküm küm nungi Ao Theological Association nung Ketdangpur aser Sanen Luden nung züngsemtem yamai shima liasü :

Tir : Mr. T. Lima Lkr Pastor Chuchuyimlang Baptist Arogo, Tatong Tir : Rev. Jongpong Pastor Mopungchuket, Senyur: Mr. Chubatemjen ABAM, Director. Mrs. Talijungla Lkr.

Sanen Luden nung Rev. L. Lima Jamir Asso.Pastor, DABA, Rev. Neken Pastor Mongchen Baptist Arogo, Rev. Moa Pastor Moayimti Baptist Arogo, Rev. Aka Pastor, Longkum Baptist Arogo, Mr. Satem Pastor, Naga United Baptist Arogo, Mrs. T. Arenla, Mokokchung Baptist Arogo, Mrs. W. Amenla Associate Pastor (Women)

Alempang Baptist Arogo, Dr. Pangernungba, OTS, Dimapur aser Mr. Nungshi Tzudir, CTC Alichen.

Taoba Bilbao Coach Ernesto Valverde Barcelona coach akümtsü akok

**Barcelona, May 29 (Agencies):**

Barcelona tir Josep Maria Bartomeu-i Hombarnü osang benertem den jembiba sülen Ernesto Valverde Barcelona coach tasenba asütsü imlar.

Honibarnü Copa del Rey final nung Alaves pur akokba sülen Bartomeu-i ashiba agi, Hombarnü board meeting ka agitsü aser idakji pai coach tasen shimsüba atema nisungtem asadangba sülen osang agütsütsü.

Valverde ya Athletic Bilbao nung coach ka ama küm 4 tashi inyaka arur taoba hopta iba club toktsü. Luis Enrique-i pa iba season tatemi club toktsütsüba March ita sangdongba sülen nungi Valverde-i iba mapa melanzütsü asoshi imlaa liasü.

Arishi küm 53 tain coach ya shimsa ajanga Barca pur tawa taoba mapang nung par club



Ernesto Valverde (File)

nung asayaa alirtem coach asütsü asoshi shimsa yimya nung maneni anidaktsü.

Valverde ya Barcelona nung season ana tashi asayaa liasü aser iba mapang nung Cup Winners' Cup aser Copa del Rey ta akok.

Pa taoba mapang La Liga nung Athletic, Espanyol, Villarreal aser Valencia clubtem nung coach inyaka liasü. Iba den külemi Olympiakos nunga pa coach ka ama inyakogo.



Rome, May 29 :Rome, Olympic stadium nung "Open goal" sentong ka nung Canada Prime Minister Justin Trudeau Francesco Totti-i sign sur aliba AS Roma pur jersey ka semer ball ka teka nung asayaba noksa nung angur.

## Tiger Woods South Florida nung apu

**May 29, 2017 (Agencies):** tanabuba jenjang nung lir. Nüntugu golf asayar Tiger Woods Hombar anepdang yi jemer mesüra temesepba mozü chir gari aniba atema South Florida nung apu, ta osang ka ajanga metedaktsü.

Woods ya taoba mapang golf operation 4ben buba agia liasü. Pai taoba hopta ashiba agi, pa taoba küm temdang nungi tang tajungba lir aser golf asaya nungi anentsü asoshi kecha sentong mali.

**BILEMDANGANG**  
"Asür ka taküm ji akümlir molungjang nung teti alir."